

ANNIVERSARY BALL DI WOMEN'S CLUB TA PRIMINTI DI BIRA FANTASTICO

ORANJESTAD(AAN)—Diabierna awor Women's club di Aruba ta celebra su 50 aña di existencia y esaki lo ta cu un "Anniversary Ball" den Stellaris Room di Americana. Si scucha comentario nan encunto e celebracion, aki por bisa cu e anochi aki sigur lo ta un anochi fantastico cu baile, diner, cabaret 85 cu su show y rifamento di premianan.

50 Aña pasa dia 17 di september 1934 e prome reunion di Women Club of Aruba a tuma lugar na Lago Community House.

150 Señora a bini hunto ariba invitacion di un directiva temporal dirigi pa Sra. Lloyd G. Smith, casa di e presidente di Lago e tempo ey. (Nota: pa e celebracion di e aña aki, lo ta presente tambe yiu homber y yiu muher di e fundadora, kendenan ta bini di Virginia, Estados Unidos).

Dia prome di october 1934 e prome directiva eligi a ser instala y e tabata consisti di un presidente, vice presidente, tesorero y secretaria.

Na April 1935 e prome ccokbook a wordo bendi na 50 cent americano pa un.

Ariba invitacion di un otro Sra. Smith Women's Club di Aruba a afilia na General Federation of Women's Club dia 8 di maart 1937. E contribucion na e federacion tabata 10 cent di dollar pa miembro, of un total di 12 dollar pa aña cu tabata ser paga, mientras cu na aruba e miembronan tabata paga 1 dollar pa aña como contribucion.

E prome persona delegada di Aruba cu a asisti na convencion di General Federation of Women's Club na Kansas City, tabata Señora Milne, na mei 1938.

Dia 9 di juli 1947 e damanan di Eagle Colony y di Oranjestad a wordo invita pa bira miembro asocia. Un di e promenan tabata Sra. Jeanette Steele cu a bira presidente na 1967 y tabata miembro te aña pasa ora cu hunto cu su esposa Sra.

Bob Steele nan a bandona Aruba.

E prome miembronan honorario tabata Sra. Kwarts, esposa di Gezagebber Kwarts, y sra. Horigan, esposa di ex presidente di Lago.

E miembro cu mas hopi tempo den e club actualmente ta señora Naomi Wajcberg, cu for di aña 1953 ta un miembro dedica y activo.

Na 1973 WCA a eligi su prome presidente no americano, y su presidente actual ta Sra. Raiza Wilson.

WCA tin actualmente un total di 185 miembro reparti ariba henter e isla.

Su miembrecia ta internacional. Ademas di ta un club social, WCA ta dedica su mes hopi na trabaonan pa comunidad y desarrollo personal. E principal actividadnan directo pa comunidad ta cu muchanan di Dr. Horacio Oduber Hospital, handicapnan, hendenan grandi di paviljoen y Maristella cu ta wordo entrete ne cu bingo, keiromento, fiesta di Sinterklaas, Pasco, Dia di mama, etc.

For di e fondo pa caridad di WCA ta ser reparti tur aña ayudo efectivo na diferente instancia cu ta den necesidad.


Na ocasion di su 50 aña di existencia un Oxy Monitor a ser regala na november aña pasa na Dr. Horacio Oduber Hospital pa yuda e baby nan cu nace cu problema di salud.

Ta ser spera sinembargo cu baymento di Lago lo no perhudica e buena marcha di e club aki cu semper a conta cu e apoyo y dinamismo di e comunidad di Sero Colorado y cu e damanan local lo sigui cu e trabao valioso di e club aki pa mas di 50 aña mas.

Pa e Anniversary Ball diabierna anochi WCA a invita tur nan miembronan, esnan actual y esnan di pasado, residencia na Aruba, hunto cu nan esposos y tambe tur e ex-presidentenan na unda cu nan ta actualmente pa asisti.



Ariba e foto aki por mira un bista di e trabaonan cu a ser haci ayera merdia durante combatimento di e candela na Wimco na San Nicolas. Ariba dak di un edificion den vecindario efectivonan di cuerpo di bombero di Lago ta yuda combati e incendio. Por mira tambe cu tabata tin problema cu un takwagen di cuerpo di bombero di gobierno pero esaki a ser remedia den un rato. Ademas di e dos trucknan di Lago cu a yuda tabata tin tambe pasamento di slang etc. via muraya di e compania pa yuda den e trabao inmenso cu tabata tin. Tanto e cuerpo di lago como esun di gobierno a haci un bon trabao evitando e candela di expande pa otro edificionan y a logra paga e cadndela completamente den un ora di tempo.



Sr. Luis Odor manager di Wimco San Nicolas aki ta dunando declaracion na Recherche despues cu el a regresa na e sitio. Un rato prome el a bandona e edificio sin cu tabata nada particular na Wimco, y den auto el a bin tende cu Wimco ta kimando.



Sr. Erroll Brown, dirigente di cuerpo di bombero di Lago durante e incendio na Wimco aki ta indicando na Sr. Guerero di Cuerpo di Bombero di gobierno cu nan ta cla cu nan lo sigui.